

# INUIT ATAQATIGIIT

## INATSISARTUNI



25. juli 2016

Inatsisartut suleriaasianni § 37 naapertorlugu Naalakkersuisunut imaattunik apeqquqarput:

### Apeqqutit:

- 1) Ilaqutariinnermut inatsisit (familieretten) ukiorpassuarni Nunatsinni nutarterneqartussaasimasooq nutarterneqarnera sumut killippa?
- 2) Familieret-p nutarternerani angajoqqaat, anaanaasut ataataasullu, akisussaaqatigiinnerannut tunngasut qanoq inissisimalerpat?
- 3) Nunatsinni Danmarkimi pissutsinut naleqqiullugu meeqqap angajoqqaani tamakkerlugit attaveqarfigisinaanissaannut periarfissai allaaneruppat?
- 4) Allaanerusimappata suna peqqutaava?
- 5) Meeraq inunngoraangat angajoqqaallu aappariittut najoratik katissimanatilluunniit meeqqamut angajoqqaatut akisussaasuuneq qanoq aalajangerneqartarpa?
- 6) Ataataasup anaanaasulluunniit meeraq najunngikkuniuk akisussaasooqataanissaannut periarfissai qanoq ippat qanorlu anguniarneqarnissaannut ikorfartorneqartarpa?
- 7) Ataatat anaanallu meeqqaminnut angajoqqaatut akisussaasooqataanngitsut meeqqaminnut attaveqarnissaminnut periarfissaat qanoq ippat pisortaniillu meeqqap angajoqqaani attaveqarfiginissaannut qanoq aqqutissiuussisoqartarpa?
- 8) Danmarkimi pissutsinut atuuttunut qulaani apeqqutigineqartut Nunatsinni qanoq allaanerusuteqarpat?

(Inatsisartuni ilaasortaq Sara Olsvig, Inuit Ataqtigiiit)

### Tunngavilersuut:

Nunatsinni meeqqat pisinnaatitaaffii sammineqarnerini angajoqqaatut akisussaasuuneq aamma sammineqartariaqarpoq. Nunat taamalaat akornanni meeqqat pisinnaatitaaffii pillugit aalajangersagaq malillugu meeqqat pisinnaatitaaffeqarput angajoqqaatik tamarmik attaveqarfigissallugit. Ajoraluartumilli amerlavallaartutigut meeqqat angajoqqaatik aappaannaa najortarpaat attaveqarfigalugulu.

Innuttaasut pisortanut akiitsui qiviraanni maannamut suli meeqqamut akilersuutit annerpaat ilaattut inissisimavoq. Angajoqqaarpasuit meeqqaminnut ulluinnarni akisussaaqataanerat killeqarpoq tamannalu allannqortariaqarpoq. Akilersuiinnerneq naammanngilaq, akiliinngitsoortorpassuaqarneratali akisussaaqataannginnermik misigisoqartarsimaneranik takussutissaasinnaasutut isigaarput.

Meeraq angajoqqaani tamarmik attaveqarfigissallugit pisinnaatitaaffeqarpoq. Nunatsinni tamassuma anguniarnerani qanoq iliortoqarsimanersoq Inuit Ataqtigiiit paaserusupparput.

Isumaqarpugut angajoqqaat meeqqaminnut akisussaasooqatigiinnissaannut periarfissagissaarnerusoqassasoq pissusissamisoornerusutullu isigineqalissasoq. Meeqqammi tamarmik angajoqqaaminnut tamanut attaveqarnissaminnut pisinnaatitaaffii atuulluarniassapput angajoqqaallu amerlanerit akisussaaqataavinnissaminnut periarfissaqarniassammata.

Ilaqutariinnermut inatsisit suli danskit akisussaaffigaat inatsisillu taakkua ukiorpassuarni nutarterneqarnissaannik sulissuteqartoqarpoq. Tunngaviulluinnartuuttipparput inatsisit atuuttut peeqqat pisinnaatitaaffiinik illersuisuussasut inatsisillu Nunatsinnut atuuttut Danmarkimi atuuttunit ajornerusumik inissisimatitsissanngitsut.

Ullut suliffiusut qulit qaangiutsinnagit akissutit tigusiassallugit kissaatigaara.